

SIARAN AKHBAR

KINI RAYUAN HAJI LEBIH MUDAH MELALUI APLIKASI THiJARI

KUALA LUMPUR, 22 Disember 2020 - Para pendeposit **TH** yang ingin membuat rayuan haji kini boleh menggunakan aplikasi THiJARI. Rayuan haji untuk tahun 1442H/2021M dibuka bermula hari ini 22 Disember 2020 sehingga 13 Februari 2021.

YB Datuk Dr. Zulkifli Al Bakri , Menteri Di Jabatan Perdana Menteri (Hal Ehwal Agama) berkata semasa merasmikan Muzakarah Haji Peringkat Kebangsaan ke-37, kemudahan terbaharu ini dibina bagi membantu orang ramai membuat rayuan haji tanpa perlu menghantar surat rayuan ke pejabat-pejabat **TH** seperti tahun-tahun yang lalu, lebih-lebih lagi masyarakat kini terkesan dengan penularan wabak Covid-19.

Selain daripada rayuan haji, bakal haji boleh menyemak pendaftaran haji, status rayuan haji, status tawaran haji, jadual penerangan serta pelbagai perkhidmatan lain seperti urusan simpanan dan pengeluaran melalui aplikasi THiJARI.

Muzakarah Haji Peringkat Kebangsaan diadakan secara dalam talian selama tiga hari bermula 21 Disember 2020 yang melibatkan 500 Pengkursus Ibadat Haji Tanah Air (PEKTA) dan turut disertai oleh pakar-pakar agama dalam menetapkan pendirian ibadat, keseragaman hukum-hakam dan mencari penyelesaian terbaik berkaitan ibadat haji, umrah dan ziarah.

Sebanyak lima (5) kertas kerja dibentang dan dibincangkan sepanjang muzakarah ini oleh Ahli Jawatankuasa Penasihat Ibadat Haji yang meliputi isu kemampuan mengerjakan haji semasa seluruh dunia dilanda wabak Covid-19. Tema Muzakarah Haji ialah, 'Menghayati Istiتو'ah Haji dalam Menangani Wabak'.

Menurut YB Datuk Dr. Zulkifli Al Bakri, kemampuan bagi individu dalam melaksanakan rukun Islam yang ke lima ini memerlukan tubuh badan yang sihat, kecukupan perbelanjaan (kewangan), perjalanan yang aman untuk sampai ke Tanah Suci sama ada menggunakan jalan darat, laut maupun udara.

"Seseorang bakal jemaah haji seharusnya menyiapkan bekalan yang cukup sepanjang perjalanan ke Tanah Suci serta keperluan menyediakan nafkah tanggungannya yang ditinggalkan sehingga kembali dari melaksanakan ibadah haji. Kewajipan bagi ibadat haji perlu kepada memenuhi syarat-syarat istito'ah," tambah beliau.

Turut hadir semasa pelancaran secara dalam talian adalah YBhg. Tan Sri Md Nor Md Yusof, Pengurus **TH**; YBhg. Datuk Nik Mohd Hasyudeen bin Yusoff, Pengarah Urusan Kumpulan dan Ketua Pegawai Eksekutif **TH**; dan YBhg. Dato' Sri Syed Saleh Syed Abd. Rahman, Pengarah Eksekutif Haji merangkap Ketua Rombongan Haji Malaysia.

-Tamat-

LEMBAGA TABUNG HAJI

Lembaga Tabung Haji (**TH**) merupakan sebuah badan berkanun yang ditubuhkan oleh Kerajaan Malaysia pada tahun 1963 dan ditadbir berdasarkan Akta Tabung Haji 1995 (Akta 535). **TH** menyediakan kemudahan bagi umat Islam di negara ini menyimpan wang untuk mengerjakan haji. **TH** mempunyai lebih 50 tahun pengalaman dalam perkhidmatan simpanan, haji dan pelaburan. Sebagai sebuah institusi haji terunggul negara, **TH** berusaha untuk mengukuhkan ekonomi umat Islam Malaysia dengan memanfaatkan dana dan sumber sedia ada. **TH** komited memberi perkhidmatan cemerlang dan memuaskan kepada semua Jemaah Haji Malaysia. Pencapaian **TH** yang konsisten telah mendapat pengiktirafan dunia sebagai model pengurusan haji inovatif. **TH** mempunyai lebih 9 juta pendeposit dan 125 cawangan dengan lebih 10,000 'touch-points' di seluruh negara. **TH** juga mempunyai sebuah pejabat yang beroperasi di Jeddah, Arab Saudi di bawah Konsulat Malaysia.

Untuk maklumat lebih lanjut mengenai perkhidmatan Tabung Haji, sila lawati www.tabunghaji.gov.my atau hubungi Tabung Haji Contact Centre di talian 03-6207 1919. Keterangan lanjut mengenai siaran akhbar ini, sila hubungi:

Affan Aimaduddin Azami Eksekutif Bahagian Komunikasi Korporat Lantai 16, Menara TH Tun Razak 201 Jalan Tun Razak Kuala Lumpur Tel: 03 2054 2238 Tel. Bimbit: 019 984 7138 Faks: 03 2164 0436 Emel: affan.aimaduddin@lth.gov.my	Mohamad Naser Jaffar Pengurus Kanan Bahagian Komunikasi Korporat Lantai 16, Menara TH Tun Razak 201 Jalan Tun Razak Kuala Lumpur Tel: 03 2054 2451 Tel. Bimbit: 019 200 8438 Faks: 03 2164 0436 Emel: naser@lth.gov.my
---	---